

Is Ikezuwa He Surat Ni Epustul Pablo Ziyà Te Ki Timoteo

Is Mehitenged te Ikezuwa he Surat he Para ki Timoteo

Megurang en si Pablo hein insurat din heini. Pinarisu sikandin tenged te kedsangyew zin mehitenged ki Kristu ne netuenan din he megaan en sikandin edhimetayi. Ne layun din egketenuzi is mehitenged te menge etew ziyà te nekedselekawà he menge lugar he nengepenurù din wey is menge pengulu zan dutun te kedtuu zan. Ne utew sikandan egkengeregeni. Iyan neisip din is: ebpekehimu ve vuwa sikandan te kebpedayun kebpenerù mehitenged te tutuu he tuluuwen dutun he timpu te utew man mahabet is menge etew he ebpenigudu edtazin kandan?

Kemulu si Pablo ziyà te pirusuwan hein impeuwit din heini is surat diyà te ki Timoteo, ne iyan en buwa heini kinehuziyanan he surat din dutun te wazè pa sikandin himetayi. Nekagi zin kayi te surat is kebulunga zin ki Timoteo te mid-isip din he anak din. Maandew wey mezukilem id-ampù din si Timoteo. Ne ebperateng daan sikandin he mekehendiya pezem si Timoteo te Ruma su wey mekepenumbaley ziyà te kandin.

Kayi he surat, duen mahabet he insugù ni Pablo ki Timoteo. Mibpehinumduman din si Timoteo mehitenged te kedumelaha te menge etew he insarig te Megbevayà diyà te kandin. Mevegat heini he terebahu. Umba kinahanglan he meheget is kedsarig din ki Jesu Kristu su para kenà sikandin mezaag te menge etew he edsupak te penurù din. Utew kinahanglan he kenè din ed-engkezan is kedwali wey kebpenerù te Meupiya he Tudtulanen mehitenged ki Jesu Kristu he nezineg din diyà te ki Pablo wey kenà sikandin medtampu te kedhisgut duen te wazè din pulus he menge hilisgutan su ebpekesamuk dà heini. Kinahanglan he iyan din ipenurù sikan is diyà ebpuun te insurat he lalag te Megbevayà su heeyan he penurù tutuu he ziyà ebpuun te Megbevayà ne zekelà is pulus din su pinaagi kayi egkehimanan is menge tumutuu te langun he meupiya he menge vaal.

Meregen is kebpekesavuk ni Pablo, iyan, melipayen gihapun su netuenan din he nekepenilbi sikandin te Megbevayà te taman te egkehimu zin. Wey netuenan

din daan he is minge pastur he iring ki Timoteo edleusen dan te ebaal is baal te Megbevayà he mibpuunaan ni Pablo.

1 ^{1,2}Sikew, Timoteo he iring te anak ku su utew ku minahal, ebpesuratan ku sikew. Iyan a si Pablo he epustul ni Jesu Kristu, *he ke và dà egkegiya, suluguen e zin. Midsugù a te Megbevayà wey ku ipenudtul is untung he wazà pidtemanan. Iyan heini sikan is impenaad din he untung he nekuwa te en pinaagi te kebpekidsevaha ta ki Jesu Kristu.*

Berakat he ikegagew ka wey kehizuwi ka te Amey tew he Megbevayà wey te Nengazen tew he si Jesu Kristu wey vegayi ke zan te melinawen he kebpekesavuk.

Is Kedesiga ki Timoteo

³Iring te nengeulaula te minge kepuun ku hustu is tuyù ku te ked-ezapa ku te Megbevayà, ne utew zekelà is kebpelesemi ku kandin dutun te layun ku kenikew ked-empua ziyà te kandin te maandew wey mezikilem. ⁴Ne emun egketenuzan ku is kedtigitis te luhè nu zutun te ked-ewai ku kenikew, utew a kenikew ebulunga ne utew a egkesuat he meked-uman ki meked-uma wey a utew melipey. ⁵Kenè ku egkelipatan he utew meheget is kedtuu nu he iring te meheget daan is kedtuu te apù nu he si Luwida wey is iney nu he si Eunisi. Ne netuenan ku he utew hustu zaan is kenikew he kedtuu. ⁶Ne tenged dutun kenè nu lipati he kinahanglan he gemita nu is ketau nu he imbegy zengan kenikew te Megbevayà dutun te kedlilai ku kenikew pinaagi te kedempaa ku te purù nu. ⁷Su is Mulin-ulin he impeulin kenita te Megbevayà, kenè ta igketalew, kekenà, edlig-enan ki zin wey ebegayan ki zin te zesen su wey mehimu he ebmahalen ta is minge zuma ta wey edtengkaan ta is langun he ed-ul-olahan ta.

⁸Ne tenged dutun kenè nu ikeeled is kebpenurù nu mehitenged te Nengazen tew ne kenè a zaan kenikew ikeeled is gaked din wey nepirisu tenged te kedsengyawa kandin, kekenà, pinaagi te gehem te Megbevayà he idtavang kenikew, ambit ka zaan kayi te ked-entusa ku te kemeresayan tenged te kedsengyawa te Meupiya he Tudtulanen. ⁹Is Megbevayà, ne iyan midlibri kenita te silut ne midhimu ki zin he gaked din. Umba mid-ulaula zin heini, kenè tenged te meupiya is minge ulaula ta, kekenà, tenged dà te iyan tuyù din wey tenged te utew zekelà is gagew zin kenita. Dengan te wazè pa limbaga is minsan hengkey mid-isisip din he ibpeehè din is gagew zin kenita pinaagi te kebegara zin kenita ki Jesu Kristu. ¹⁰Ne guntaan impeehè en kenita haazà is gagew zin su mibpeetew si Jesu Kristu he iyan Menluluwas tew. Ne si Jesus, in-awè din is gehem te kemetayen ne pinaagi te Meupiya he Tudtulanen impesavut din kenita he egkevegayan ki te untung he wazà pidtemanan.

¹¹Ne siak, midtezù a te Megbevayà wey a mehimu he epustul ne wey ku ikesangyew wey ipenurù haazà is Meupiya he Tudtulanen, ¹²ne tenged kayi egkeantus ku guntaan heini is kemeresayan. Ne minsan pa zutun, netuenan ku ke hentei sikandin is midserigan ku, ne netuenan ku zaan he taman te andew keuzemà he edsusiyen din is nengeulaula te menusiya, metau sikandin he ebantey te langun he insarig din kediey.

¹³Is tutuu he tuluuwen he impenurù ku kenikew, kinahanglan he iyan layun edsunuzen nu. Hemeni nu is kedtuu nu te Megbevayà wey is kebmahala nu te minge zuma nu su iyan heini tuus te kebpekidsevaha ta ki Jesu Kristu. ¹⁴Pinaagi te kedtavang te Wagas he Mulin-ulin he zini ed-ubpà te kenita, bentayi nu he kenà mahal in haazà is tutuu he tuluuwen he insarig kenikew te Megbevayà.

¹⁵Netuenan nu en he is langun he minge tumutuu zini he ebpuun te prubinsya he Asya, wazè e zan tevangi. Elin dutun si Pihilu wey si Hirmuhinis. ¹⁶Iyan, berakat he mehizuwi te Nengazen si Unisipuru wey pemilya zin. Su layun e zin edtevangi kayi te minge keseengan ku. Wazè din ikeeled is kebpenumbaley zin kedì te pinirisu, ¹⁷kekenà, dutun dà te kebpekeuma zin dini te Ruma, mibpeniguduwan e zin pen-ahaa taman te neturedu e zin. ¹⁸Id-ampù ku layun he mehizuwi sikandin te Nengazen keuzemà te andew te kedsusi te Nengazen te langun. Ne netuenan nu en daan he zekelà is kedtevangi zin kedì diyang te Ipisu.

Is Butan he Sundaru ni Jesu Kristu

2 ¹Sikew, Timoteo, is iring te tutuu he anak ku, hegeta nu is kedtuu nu su zekelà is tavang te Megbevayà kenita tenged te nekidsevaha ki ki Jesu Kristu. ²Nezineg nu is kebpenurua ku te tutuu he tuluuwen diyà te mezakel he minge tumutuu; ne kinahanglan he ipenurù nu zaan heini diyà te minge etew he egkeserigan nu su wey mekepenurù dan daan te zuma.

³Ambit ka zaan kayi te ked-entusa ku te kemeresayan tenged te kedtuu su wey ka mehimu he suluguen ni Jesu Kristu he iring te metinumanen he sundaru. ⁴Sikan is mibpesundaru, ne kenà egkehimu he ed-ul-ulahan din is ed-ul-ulahan te kenà sundaru, su kinahanglan he layun sikandin andam te kebpenunuat te egalen din. ⁵Is suluguen te Megbevayà, ne iring te ibanggà. Ne is ibanggà, kenà ebpekezaag ne kenà ebegayan te suhul emun kenè din edsunuzen is belaud te kebpekibanggà. ⁶Ne iring daan is suluguen te Megbevayà te ebasuk. Is etew he midhagù mebasuk, ne iyan sikandin egkehuna he ebpekezawat te vahin te sebpet din. ⁷Isipa nu heini is impesavut ku kenikew ne edtevangian ka te Nengazen wey nu mepurung heini mesavut.

⁸Kenè nu lipati he si Jesu Kristu, mibpeetew he kevuwanan ni Hadì David ne mibpehimatey ne nevanhew. Iyan heini ibpesavut ku emun

ebpenudtul a te Meupiya he Tudtulanen. ⁹Ne tenged kayi te kebpenudtul ku te Meupiya he Tudtulanen midrasey a te menge kuntada te Megbevayà ne neegen a te kedina he iring te mesinupaken, iyan, kenà mulà egkeegen is Lalag te Megbevayà. ¹⁰Ne tenged kayi ed-entusen ku is minsan hengkey he merasey wey ku metevangi is menge etew he pinili te Megbevayà. Egkesuatan ku he melibri sikandan te silut pinaagi te kebpekidsevaha zan ki Jesu Kristu ne mekezawat dan te ketulusan he wazà pidtemanana. ¹¹Uteu tutuu is penurù he edhenduen te,

“Ke pinaagi te kedhimuwa kandin he elili kenita minatey ki en duma kandin,

duen te en daan untung duma kandin.

¹²Ke ed-antus ki te kemeresayan ebpekehadì ki keuzemà duma kandin.

Iyan, ke egkagi ki he kenè ki gaked din egkagi zaan sikandin keuzemà he kenè ki iyan gaked din.

¹³Minsan ke kenè ki metinumanen te lalag din kenita, metinumanen mulà sikandin te lalag din su kenà egkehimu he kenè din edtumanen is lalag din.”

Is Meupiya he Suluguen

¹⁴Kegiyi nu is menge tumutuu he kenè dan melipati heini is langun. Iyan nu itelaan kandan he ibpetistigus is Megbevayà he likayi zan is kebpekidlawan he winali mehitenged te kehulugan te menge lalag su wazè din pulus ne ebpekezezaat te kedtuu te ebpekezineg duen.

¹⁵Himuwa nu is taman te egkehimu nu su wey mesuati te Megbevayà ne wey kenè nu ikeeled is baal nu. Kinahanglan he utew hustu is kebpenurua nu te tutuu he tuluuwen.

¹⁶Likayi nu is winali he kebpenurù he kenà egkesuatan te Megbevayà, su pinaagi zutun ed-iseg is kenà kedtahud kandin te menge etew. ¹⁷Is menge etew he iring kayi is kebpenurù dan, ne iring te it-it is penurù dan su ebpekeeneb ne ebpekezezaat. Is kebpenurù ni Himinyu wey ni Pilitu, ne iring kayi.

¹⁸Midsuwayan dan en is kebpenurù te tutuu he tuluuwen ne pinaagi zutun nehugkà is kedtuu te zuma he menge tumutuu. Egkegiyen dan he nepasad en is kebenhawa kenita. ¹⁹Ne minsan pa zutun kenà egkehalin kes tuluuwen he midtukud te Megbevayà su zuen insurat he Lalag te Megbevayà he edhenduen te, “Egketuenan te Nengazen ke hentei is menge etew he gaked din,” wey zuen pa zaan lalag he edhenduen te, “Is minsan hentei he egkagi he gaked sikandin te Nengazen, ne kinahanglan he ed-iniyugan din is mezaat he ulaula.”

²⁰Diyà te minsan hendei he zekelà he valey zuen menge gelemiten he vulawan wey pelata ne zuen daan dutun menge gelemiten he kayu wey diniyun. Wey zà egemita is menge gelemiten he vulawan wey pelata ke

zuen keemuran, iyan, is duma, andew-andew mulà is kegemita zuen. ²¹Ne sikan is etew he egkesuat he mahala wey metegeley te Megbevayà he iring te utew mahal he gelemiten, kinahanglan he ed-iniyugan din is langun he mezaat he ulaula. Ne human sikandin dait he egemiten te Megbevayà te minsan hengkey he meupiya he ulaula. ²²Iniyugi nu is menge mezaat he kebaya te menge menguhed. Hemeni nu is metazeng he ulaula; layun ka sarig te Megbevayà; mahala nu ziyà te gehinawa nu is minsan hentei he tumutuu; peniguduwi nu he melinew is kedepitè niw te menge zuma nu su iyan heini menge ulaula te langun he menge etew he ebpetavang te Megbevayà tenged te iyan dà egkesuatan dan is kedtumana zan te menge sugù din. ²³Iyan, kenè ka penlavetlavet dutun te menge winalì wey pinaglung he ed-istudyuwan. Netuenan nu en he iyan haazà puunà te kebpekid-eget. ²⁴Ne netuenan nu zaan he kinahanglan he kenà mebpekid-eget is suluguen te Nengazen, kekenà, purungi zin layun is minsan hentei he etew. Kinahanglan he metau he ebpenurù ne mepelevayen daan sikandin. ²⁵Emun menayù is kebpenurua zin te menge kuntada zin, kela ke mahalin te Megbevayà is gehinawa zan wey zan mesavut is tutuu he tuluuwen. ²⁶Ne pinaagi zutun human ebmetandang is ked-isipa zan te langun, ne human dan egkepeleguyi is gehem ni Setanas su iyan si Setanas nekezakep kandan wey zan metuman is egkesuatan din.

Is Huziyan he Timpu

3 ¹Kinahanglan he sevuta nu he timpu te kemeregenan haazà is ketepusan he timpu keuzemà te kenè pa edlimasen is menusiya. ²Su zutun he timpu legezen is menge etew wey iyan mahal ziyà te gehinawa zan is selapi. Ebmepelevawen wey ebmepedeligen dan. Edsulaan dan is menge zuma zan; kenè dan ebpeminengen is menge lukes dan; ne kenè dan ebpeselamat. Utew lalung sikandan. ³Kenè dan ebmahalen is menge zuma zan; kenà egkeawà is pauk dan. Bereitik sikandan; kenè dan egkeegen is menge mezaat he kebaya te lawa zan. Utew zan mevurut ne wazà minsan hengkey he meupiya he ulaula he kenè dan egkeepesan. ⁴Menge men-aakal sikandan; kenè dan ed-isipen ke hengkey is egkeulaula tenged te kelelalung dan. Menge gelbuwen sikandan. Iyan dan ibpelavi is kelibutanen he kelihey kenà is kebmahala zan te Megbevayà. ⁵Uvag sikandan ed-azap te Megbevayà, iyan, kenè dan edtuu he zuen gehem din. Likayi nu is menge etew he iring dutun. ⁶Iyan duma zutun is menge maama he edseled te menge valey wey zan mepenurù wey meveyveyai is menge vahi he wazà menge pulus. Is menge vahi he iring kayi, egkehandek dan tenged te mezakel he neveelan dan he salà, iyan, mezakel zaan is menge mezaat he egkesuatan dan. ⁷Layun sikandan ebpepenurù, iyan, kenè dan edsevuten is tutuu he tuluuwen. ⁸Haazà is

menge maama zaan, edsumpalit dan te tutuu he tuluuwen. Netazin en utew is isip dan ne uvag dà is kedtuu zan te Nengazen. Iring sikandan ki Hanis wey ki Hembiris he midsumpalit dengan ki Moises. ⁹Kenà ebpekeuswag is ed-ul-olahan te menge etew he iring kayi su egkeahà te langun he engey sikandan iring ki Hanis wey ki Hembiris.

Menge Telaan

¹⁰Ne sikew mulà, Timoteo, nepurung nu en metueni is langun he impenurù ku, is menge vetasan ku wey is egkesuatan ku he meulaula ku. Netuenan nu zaan is kedtuu ku te Megbevayà, is kebmepelevayen ku, is kebmahala ku te minsan hentei, wey is ked-antus ku te kemeregenan. ¹¹Netuenan nu zaan is menge kemeresayan wey menge keseengan he nengeantus ku. Netuenan nu zaan is langun he neegiyen ku ziyà te mendinge he Entiyukya, wey Ikunya, wey Listera wey is langun he utew merasey he naantus ku. Is Megbevayà, ne midlibri e zin kayi te langun. ¹²Ne is langun he tumutuu ki Jesu Kristu he egkesuatan dan he pinaagi kandin metuman dan is egkesuatan te Megbevayà, edresayen sikandan te menge kuntada te Megbevayà. ¹³Iyan, is menge lalung he etew, wey is menge uvag kun tumutuu, ed-iseg mulà ebmezaat is menge ulaula zan. Edtezinen dan is isip te menge etew, iyan, egketazin daan is kandan he isip. ¹⁴Ne sikew mulà, hemeni nu is tuluuwen he impenurù kenikew he netuenan nu he tutuu. Netuenan nu ke hentei is nemekepenurù kenikew ¹⁵ne egketenuzan nu he zengan te vatè ke pa nesavut nu en is insurat he Lalag te Megbevayà. Dutun te lalag din ebpuun is kedsavut he iyan paagi te kedlibriya kenita te silut emun edtuu ki ki Jesu Kristu. ¹⁶Impinted te Megbevayà is kedsurata te langun he insurat he menge lalag din, ne zekelà is tavang kenita kayi te lalag emun ebpenurù ki, emun edawey ki, wey ke edsambag ki te menge tumutuu wey emun ibpenurù ta is metazeng he ulaula. ¹⁷Pinaagi te ked-istudyuwi kayi te lalag ebmetau ki is suluguen te Megbevayà ne egkehimu ta is minsan hengkey he meupiya he ed-ul-olahan.

4 ¹Duen idtelaan ku kenikew, ne is Megbevayà wey si Jesu Kristu, iyan ebpeketistigus kayi te menge lalag ku. Netuenan ta he edlikù si Jesus su iyan sikandin hadi ne iyan sikandin edsusi keuzemà te nengeulaula te minsan hentei, se uuyag pa wey is nemematey en. ²Ne tenged kayi iyan idtelaan ku kenikew is: ipesavut nu is Lalag te Megbevayà. Kinahanglan he layun ka andam te kebpesevuta te lalag din te minsan keenu he timpu ke zuen egkesuat he ebpeming wey ke wazà. Dewaya nu is menge etew, sembagi nu he med-iniyug dan te mezaat he ulaula. Hengyui nu sikandan. Kinahanglan he layun ka mepelevayen is ebpenurù kandan. ³Umba idtelaan ku heini kenikew su egkeuma keuzemà is timpu he kenà edewaten te menge etew is tutuu

he tuluuwen, kekenà, iyan dan edsunuzen is menge mezaat he kebayè dan. Ebpemepenurù dan te mezakel he menge menenudlù. Ne iyan ibpenurù kayi is tuluuwen he utew zan egkesuati te ebpemineg. ⁴Kenè dan ebpeminegen is tutuu, kekenà, iyan dan edtuuwan is menge tarù he gugud. ⁵Iyan, sikew mulà, tengkai nu is ed-ul-ulahan nu te minsan keenu he timpu. Entusa nu is kemeregenan. Peniguduwi nu te edsangyew is Meupiya he Tudtulanen. Purungi nu tumana is langun he ebpeveelan kenikew te Megbevayà.

⁶Siak mulà, megaan en egkeepus is umur ku; megaan en egkeuma is kebpatay ku. ⁷Nepasad ku en is kebengгаа kedì te Megbevayà; nekeuma ad te edungguan te edlumbà. Hustu is ked-ikula ku te tutuu he tuluuwen. ⁸Ne guntaan integana en kedì te Nengazen is suhul he iyan ibegey zin diyà te langun he memetazeng he etew. Ibegey zin heini keuzemà te andew te kedsusiya zin te nengeulaula te tivuuk he menusiya. Iyan sikandin kes metazeng is kedsusi zin. Ne kenà iyan e zà midtegenahan din te suhul, kekenà, midtegenahan din daan is langun he utew egkegalaw ke ebpekelikù sikandin.

Is Insugù ki Timoteo

⁹Himuwa nu is taman te egkehimu nu wey ka megaan mekehendini ¹⁰su mid-ewaan a ni Dimas tenged te iyan egkenugunan din is untung din dini te kelibutan. Midhendiyà sikandin te Tiselunika. Ne si Krisinti, midhendiyà te Gelasya, ne si Tito zaan, midhendiyà te Delmasya. ¹¹Iyan dà дума ku kayi, si Lucas. Tuluya nu si Marcos ne zumaha nu zini su zekelà is tavang din kedì te langun he ed-ul-ulahan ku kayi. ¹²Midsugù ku si Tikiku ziyà te inged he Ipisu. ¹³Sikan is kumbalè ku he intagak ku ziyà te ki Karpu he ziyà te Truwas, meupiya ke ed-uwiten nu zini. Uwita nu zaan sikan is midlulun he menge libru, lavew en sikan is diyà isurat te lundis.

¹⁴Uteu mezaat is mid-ulaula kedì ni Alejandro, sikan is pandey te tumbaga. Iyan ebaes kandin is Nengazen. ¹⁵Endami nu sikandin su utew mezesen is kedsumpelita zin te tuluuwen he ibpenurù ta.

¹⁶Dutun te nehuna he ked-imbistiga kedì wazà minsan hentei he midtavang mebpenistigus kediey su mid-ewaan a zuen te langun. Id-ampù ku he mepesaylu sikandan te Megbevayà. ¹⁷Minsan pa zutun midtevangen a te Nengazen ne midlig-enan e zin ne tenged dutun nepurangan ku te edsangyew is Meupiya he Tudtulanen diyà te langun he menge etew zutun he kenà menge Hudiyu. Ne tenged dutun nelibri a ne wazà a mehimetayi. ¹⁸Ne kenà dutun dà taman su edlibriyen e pa te Nengazen te minsan hengkey he ebpekekaid kedì ne edlig-enan e zin taman te ed-uwiten e zin dutun te ginhedian din diyà te langit. Berakat he zeliga sikandin te wazà pidtemanan.

¹⁹Ipengemusta a ki Priscila, ki Ekilu, wey ki Unisipuru wey is pemilya zin. ²⁰Mibpetagak si Irastu ziyà te Kurintu ne intagak ku si Trupimu ziyà te Militu su nezeruwan. ²¹Gaanggaan ka hendini te kenè pa tipenguzan.

Ebpengemusta kenikew ensi Yubulu, si Pudinti, si Linu, si Claudia, wey is langun he menge tumutuu zini.

²²Berakat he zumahi kew te Nengazen. Ikegagew kew zin is langun. Iyan a si Pablo.